

Vorred.

durchforschen / examinieren vnd perpendieren soltet / den Grund
daraus zufassen / vnd zulernen trewlich verlassen.

Wie selige Leuth sind dazumal gewesen bey Euch / die dies
sen Thewren Mann Gottes THEOPHRASTVM, Veneran-
dum Lumen totius orbis terrarum gesehen / vnd fandt haben:
Noch seliger aber / die ime / vnd seinen thewren Göttliche / ja En-
glischen Schrifftten gefolget hetten. Ach wie glückselig vnd vber-
glückselig wolte ich mich düncken lassen / so dieser Phoenix incluz-
tus noch im leben / ich wolte ihm nachreisen solte ich 2000. oder
noch 3000. Meil wegs reysen / wie ich Gott lob schon glücklich
vollbracht / daß ich seine Kundtschafft / Familiaritet haben / vnd
ihm als einem Gesandten vnd zeugen Gottes anhangen / seine
wort auß seinem Mund excipiern / vnd seiner Lehr in allem nach-
kommen könnte. Dann er das Liecht der Natur / so mit Hends-
nischer Philosophen vnd finsternussen vberschwemmet / herfür
ans Liecht gebracht / vnd widerum Gott lob dermassen illustriert
in seinen Scriptis, daß wirs von anbegihn der Welt nicht besser
jemals gehabt haben / Rumpantur ut ilia mundo, & invido Co-
dro. Was Medicinam anlangt / darff nicht viel beweisens / die
practierten Prob vnd Exempel seiner Curen in allerley Generi-
bus Morborum, Galenico Gregi incurabilibus, sind hin vnd in
frischer gedächtniß vnd gleich den Miraculis zuhalten vnd zu-
achten. Was seine Theologica Scripta anlangt / sind die bishe-
ro alle mit einander / durch des Teuffels getrieb von seinen Or-
ganis den Pseudopræconibus, vnd Pseudochristis vndergetruckt
worden / Aber es ist nun an der zeit / daß sie herfür müssen / vñ solt
die Welt darüber zerparsten vnd zerspringē / wie es ludas erganz
gen ist / Dann keine Apostel mehr in der Welt zufinden / die ohne
Seckel vñ Täschen gehen / Sie wollen alle ludas Beuttel haben
vnd tragen. Ob man sich schon Successores Petri rühmet / vnd
nachfolger der Aposteln / beweisens doch das werck nicht / da wer-
den die Blinden nicht sehendt / die Lahmen nicht gehendt oder ge-
rad / die Aussckige nicht rein / durch aufflegung der Händ keine
Krancken gesundt / keine Teuffel außgetriebē / Sondern das wi-
derspiel geschicht wol / daß die sehenden blind / die hörenden vnd